

**Malaysia terima keputusan Australia – Hishammuddin
Utusan Online
October 15, 2011**

PUTRAJAYA 14 Okt. - Malaysia menerima dan mengambil sikap terbuka berhubung keputusan Australia membatalkan perjanjian pertukaran pelarian dan pemohon suaka antara kedua-dua negara yang ditandatangani di Kuala Lumpur pada 25 Julai lalu.

Menteri Dalam Negeri, Datuk Seri Hishammuddin Tun Hussein berkata, walaupun usaha itu gagal dilaksanakan seperti dipersetujui, usaha gigih kedua-dua pihak telah berjaya menarik perhatian masyarakat antarabangsa.

"Kerajaan Malaysia telah membuat pelbagai perancangan rapi bagi melaksanakan aturan tersebut dengan menjadikan nilai kemanusiaan sebagai asas rujukan utama.

"Pendekatan yang kita ambil termasuk menyediakan kemudahan pusat memproses dan perbincangan serta tindakan yang rapi membuktikan kita bersedia meneroka satu kaedah penyelesaian baru dalam menangani isu tersebut pada masa akan datang," katanya dalam satu kenyataan di sini hari ini.

Menurutnya, ini secara tidak langsung menunjukkan kemampuan Malaysia untuk membuat keputusan yang boleh memberi impak besar kepada isu berkenaan.

Hishammuddin berkata, sebahagian besar matlamat yang ingin dicapai sebenarnya telah dikecapi apabila masyarakat antarabangsa mula memberi perhatian dan maklum balas berhubung aturan pertukaran tersebut.

"Matlamat asasnya adalah mengenai nasib pelarian dan pencari suaka serta pentingnya kita terlibat secara langsung membanteras pelbagai kegiatan negatif berkaitan perkara ini," katanya.

Beliau yakin keputusan kerajaan Australia itu bukan penamat kepada usaha mencari penyelesaian dalam soal pelarian dan pencari suaka.

Ini kerana katanya, kerajaan mengakui hakikat bahawa Malaysia adalah salah sebuah negara yang berada di tengah-tengah laluan perjalanan pencari suaka dan pihak berkuasa akan melipatgandakan usaha menangani permasalahan itu.

Menurutnya lagi, Malaysia akan memanfaatkan sepenuhnya Mesyuarat Tahunan Kumpulan Kerja Australia-Malaysia Keempat di Sydney bulan depan untuk memperhalusi perkara itu.

Negara tegas beliau, akan terus mengambil pendekatan proaktif dalam menangani isu itu termasuk mengadakan perbincangan dua hala dengan negara-negara lain khususnya negara transit dan destinasi kepada jenayah perdagangan manusia.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2011&dt=1015&pub=Utusan_Malaysia&sec=Dalam_Negeri&pg=dn_01.htm